

耀州志

一
玉
四
冊

卷三石耀州志序

郡人惇物張蒙訓譔

耀州舊志七卷先大人所論著君子蓋數稱焉其於
民之隱瘼獨反復致意云如糧布役夫數事當途者
已畧施行之矣書由是觀焉志其可已哉顧屬內二縣
朱暇紀錄爲闕余友喬子景叔乃始攷正增益彙爲
通志九篇曰地理曰建置曰祠祀曰田賦曰官師曰
人物曰選舉曰紀事曰藝文凡十有一卷於是郡邑
之故悉章章明備矣夫志者紀事之文也而其文必
史才識備焉故能博綜古今盡物理人情之變以達

政非苟而已也要其指歸惟在審覈事實闕疑傳
信究切當世之務已矣而作者或務誇誕其辭剽奇
飾美離於本真何以示久遠哉經濟者亦無取焉余
竊以爲過矣及觀景叔之作然後乃知文在茲也博
而有要直而能核茲不爲善志邪其於山川沿革官
師人物之際詳哉其言之矣而稽諸羣籍咸有依據
使讀之者如履其地而揖其人卽古之良史何以加
焉至若利病俱陳否臧弗掩可以範世惠民宜於時
政則其意益深遠矣景叔才高識遠見於著作者類
如此世之君子知景叔者亦必以此夫志之作也始

於郡守曲沃李公

廷寶

成於莆田江公

從春

命匠梓

錢則郡侔襄垣王公

三君子者長於政者也志

其不爲虛文矣嘉靖丁巳十二月望日序

喬三石耀州志序

同賜進士出身嘉議大夫都察院右副都御史西京許宗魯議

往余官楚臺眎學校時撫臺南海黃公衷則嘗屬余
爲楚通志云余因爲論曰志不易爲也累疊不秩則
案牘爾詎炫不情則滑稽爾採覽不充則盲瞶爾去
取不專則胥徒爾且志之爲志山川疆理辨析宜審
沿革易置攷究宜詳事神使民祠賦宜重官師人物
懲勸宜公皆志之鉅典也能集所長而不蹈所短俾
攷故者有所據卽事者有所鑒其惟良史哉余則非
人也黃公謂爲然頃得喬大夫所爲耀志讀之見其

挈綱盡目備往招來詳不贅詞約不遺跡不眩浮談
不溺塵習井然有倫燦然不晦質余往論蓋兼集所
長而不蹈襲所短者也真良史哉大夫耀人生於斯
學於斯方其爲志也目其時事證諸典籍拾其故實
叅諸耆老故筆者皆直詞削者皆蔓語使攷耀政者
不假他求立盡其要善乎其爲志也已若夫慨古風
之日變傷末俗之日偷舉一隅而舉諸四海有遺論
焉君子不忌斯世達人耻於獨善意寓言表矣史乎
史乎其在茲乎志凡十一卷同官富平以屬邑附故
統言之別志五臺山者表郡之賢而不休於邪也志

成郡守江君

問序於我姑述其旨要倡於簡端

喬三石耀州志凡例

秦漢置北地郡其屬縣亦有泥陽富平之名攷其地在靈武弋居間自魏文帝始徙北地於殺胡故自漢以前言北地富平泥陽者不書書自魏始

後魏太武時又徙北地郡於宜君縣自太武以後守北地者如梁祐劉藻唐永侯恕之類皆不書

太武時於泥陽置北雍州莊帝時徙北雍州於三原永熙初復自三原徙泥陽莊帝時北雍州事不書如毛鴻賓之類是也

南渡以後晉宋齊梁間中原郡縣皆僑立南上雖襲

前名實非故域故其事皆不書

兩漢曰祓祔魏以後曰泥陽曰宜州曰華原曰永安
曰崇州曰義勝軍曰靜勝軍曰順義軍曰感義軍曰
感德軍皆耀州地其事皆書之耀州

頻陽襄德土門美原鼎州裕州與中華郡通川郡俱
富平地其事皆書之富平

遼亦有耀州宜州耀在渤海宜在遼西宋亦有宜州
在廣南金亦有順義軍在朔州皆非今耀州地事皆
不書

宋亦有鼎州在京西路非今富平地不書

官職有加領者如劉裕加領北雍州刺史是也有遙
領者如宋魏王子柄升耀州觀察使是也實皆不在
其地如此類甚多皆不書

凡事涉國典海內共有者不書

星野古以國論蓋括地廣遠矣今志一州二縣小不
書

諸將帥禦患名臣建議雖不官其地而功德此地者
是安可湮沒也故別爲紀事志令後世得頌說焉而
災異變故亦附書之

古今人有著述傳世者皆標其書目卷帙爲藝文志

蓋志以宣人文故也諸修建記與詩以語多不錄
明代官師畧以所聞見著其行事其見任者不書
人物存者不錄其行事蓋君子身後而事始定也
同富無舊志可據故事有遺落且難免錯誤也俟後
之君子增定焉

凡例終

喬三石耀州志目錄

第一卷

地理志

統歷代沿革

第二卷

地理志

紀山川所築古蹟陵墓

第三卷

建置志

廟祀志

第四卷

田賦志

第五卷

官師志

第六卷

官師志

第七卷

人物志

第八卷

人物志

第九卷

選舉志

第十卷

紀事志

第十一卷

藝文志

嘉靖初張先生撰州志叙載明備矣頃太守李君

廷

寶欲續紀後事又彙二屬縣統爲一志以余屬草藁

焉夫州邑易置與山川城池皆地理之故故志先地理有城池而後有官府有社稷故建置次之建置既定政事斯興田賦者政之大者也故繼之以田賦田賦非官不理城池社稷非官不守故志官師師道立則賢才出故志人物賢才用世進取殊塗故選舉志

備焉其意義闕遺者則括之紀事藝文志中凡一十
一卷而一州二縣事大畧具矣顧蒐羅不廣又文辭
不修不足以彰往蹟宣人文也余甚懼焉然覈事紀
實不敢以野求疑訛者叅之亦欲以傳信將來也至
其損益訂定則俟後之作者焉嘉靖三十六年七月
望日喬世寧志

